

Schuch/ vnd zoll oder Daumen breit. etc. Zum dritten / dardurch eines jeden Feldes größe außgesprochen wirdt / welches geschichte durch quadrat Morgen/ Ruten/ oder andere Namen. Damit man eines Landes größe zuverstehen gibt: Denn es gehet hierin zu / wie man spricht: Viel Köpff viel sinn / Dieweil selten zwey Länder/ Ja zwo Stät. gefundē werden/ die in den Namen vnd grössen der Maß überein kommen/ dan an etlichen orten hat man Morgen/ an etlichen Tagwerck/ Zucharten/ Bodenmassen vnd andere Namen/ dar durch vnder verschiedene grössen angezeigt vnd verstanden werden / Ja es wirdt auch nicht allein durch zwen/ sondern wol durch einen Namen vnder verschiedene grössen/ an etlichen orten verstanden. Also ist nicht allein ein großer vnterschiedt in den Namen/ von größe der Felder/ sondern auch in den namen der Massen/ damit die Felder gemessen werden: Als da seindt fingerbreit oder zoll/ handtbreit / schrit/ Ellen/ Roslauf / vnd dergleichen.: In diesen Landen da wir wohnen/ gebraucht man gemeiniglich vor die fürnehmste maß ein Ruten/ die in etlichen orten vnder verschiedene lēge hat / welche Ruten getheilt wirdt/ in 10/ 12/ 14/ 16/ mehr oder weniger gleiche theil/ nach jedes Landes gewonheit/ dern jedes theil ein fuß oder schuch genant wirdt/ diese schuch wirdt wiederumb in 10. 12. 14. 16. mehr oder weniger theil getheilt/ dern yeder ein zoll oder daumenbreit geheissen/ vnd die weil vns die Ruten/ schuch oder fuß/ daumen oder zoll/ am bequāsten zu sein bedancken/ so wollen wir die in vnserm werck bisweilen/ aber fürnehmlich die Ruten vnd zehende theilungen derselben / (als die aller leichteste vnd beste theilung) gebrauchen.

Darumb gunstiger Leser/ damit wir in diesem Buch nicht viel vergeblicher wort verlihren/ so wisse das wan wir von der lēge einer Linij reden/ als so wir sprechen/ van A zu B ist 100. Ruten / das wir damit verstehen eine blossē lēg/ ohne einige breiten / aber so wir reden von einer gewissen Flech oder Superficien/ das wir auch neben der lēge ein gewisse oder wahre breiten verstanden haben wollen. Vnd damit wir nun kommen zur erklerung der zeichen/ so wollen wir am ersten für die handt nehmen die Ruten / getheilt in 12
schuch